

Strateški plan rada
2025-2027

Godišnji program rada
za 2025. godinu
Kantonalnog suda u Bihaću

Bihać, novembar 2024. godine

Sadržaj:

A.	Uvod	2
1)	Opis nadležnosti suda, sa vizijom i izjavom o misiji.....	3
	Mandat, misija i vizija	3
2)	Sažetak analize strateškog okvira	4
3)	Pregled strateških i trogodišnjih ciljeva za period strateškog planiranja	5
4)	Sažetak prioriteta za plansku godinu, kao i procjene mogućih problema i rizika u realizaciji	7
5)	Analiza unutrašnjeg i vanjskog okruženja u kojem radi sud	9
B.	Pregled ciljeva i godišnjih aktivnosti po strateškim i trogodišnjim ciljevima	11
C.	Godišnji plan rješavanja predmeta	13
D.	Ostale informacije	13

A. Uvod

Obaveza predsjednika suda da sačini godišnji program rada propisana je odredbom člana 8. stav (1) tačka (f) Pravilnika o unutrašnjem sudskom poslovanju („Službeni glasnik BiH“, br. 66/12,40/14,54/17,60/17 i 30/18)

Svrha sačinjavanja programa rada je da se osiguraju uslovi za blagovremeno, efikasno, kvalitetno, profesionalno i transparentno obavljanje poslova iz utvrđene nadležnosti suda.

Program rada Kantonalnog suda u Bihaću za period 2025.-2027. godina predviđa realizaciju zadataka i poslova koji proizilaze iz nadležnosti ustanovljene Ustavom BiH, Ustavom FBiH, Ustavom USK-a, Zakonom o sudovima u FBiH, Zakonom o VSTV-u BiH, te drugim zakonskim i podzakonskim propisima kojima se reguliše nadležnost sudova.

Strateški cilj ovog suda je da održi rezultate postignute u prethodnom periodu, te da dodatno poboljša efikasnost i kvalitet u donošenju odluka u cilju pružanja pravne sigurnosti svim građanima na području Unsko-sanskog kantona i njihovu bolju informisanost o aktivnostima suda.

Analizom dosadašnjih rezultata rada u ovom sudu može se konstatovati da je sud ažuran i da je kvalitet sudskih odluka na zadovoljavajućem nivou na građanskim i upravnim predmetima dok je kvalitet rada na krivičnim predmetima dosta lošiji i treba uložiti dodatni napor da se poboljša. Ostvarena kolektivna norma na nivou suda u prethodnim godinama, kao i individualna norma sudaca, pokazatelj je stalnog nastojanja da se ažurnost suda postavi na zavidan nivo.

1) Opis nadležnosti suda, sa vizijom i izjavom o misiji.

Mandat, misija i vizija

Mandat suda

Kantonalni sud u Bihaću osnovan je Zakonom o sudovima u Federaciji Bosne i Hercegovine („Službene novine F BiH“ broj: 38/05, 22/06, 63/10, 72/10 7/13 i 52/14) za područje Unsko-sanskog kantona. Stvarna nadležnost ovog suda propisana je članom 28. istog zakona a obuhvata slijedeće:

1. Prvostepena nadležnost:

- a) da sudi za krivična djela za koja je zakonom propisana kazna zatvora više od 10 godina ili dugotrajni zatvor, ako zakonom nije određena nadležnost drugog suda;
- b) da postupa u toku istrage i nakon podizanja optužnice u skladu sa zakonom;
- c) da sudi za krivična djela za koja je Sud Bosne i Hercegovine prenio nadležnost na kantonalne sudove i
- d) da odlučuje u svim upravnim sporovima kao i o zahtjevima za zaštitu sloboda i prava utvrđenih ustavom ako su takve slobode i prava povrijeđeni konačnim pojedinačnim aktom ili radnjom službenog lica u organima uprave odnosno odgovornog lica u preduzeću, ustanovi ili drugom pravnom licu kada za zaštitu tih prava nije osigurana druga sudska zaštita.

2. Drugostepena nadležnost:

- a) da odlučuje o žalbama protiv odluka općinskih sudova
- b) da odlučuje o žalbama izjavljenim na rješenja o prekršajima
- c) da odlučuje o drugim redovnim i vanrednim pravnim lijekovima ako je to određeno zakonom

3. Ostalo:

- a) da rješava o sukobu mjesne nadležnosti između općinskih sudova sa područja kantona
- b) da odlučuje o prenosu mjesne nadležnosti sa jednog općinskog suda na drugi općinski sud na području kantona
- c) da odlučuje o brisanju osude i prestanku mjera sigurnosti i pravnih posljedica osude na osnovu sudske odluke
- d) da postupa po molbama za pomilovanje u skladu sa zakonom
- e) da rješava o priznavanju odluka stranih sudova, stranih trgovačkih sudova i stranih arbitraža
- f) da pruža međunarodnu pravnu pomoć u krivičnim predmetima i
- g) da obavlja druge poslove određene zakonom

Misija suda

Kantonalni sud u Bihaću pravovremeno, efikasno, odgovorno, nepristrasno, nezavisno, kvalitetno i pravično obavlja zakonom utvrđene poslove.

Vizija suda

Kantonalni sud u Bihaću osigurava svim građanima jednak pristup pravdi u skladu sa zakonom i najvišim standardima zaštite ljudskih prava i sloboda te efikasno i kvalitetno rješava sve postupke.

2) Sažetak analize strateškog okvira

Strateški okvir u najvažnijem dijelu čine slijedeći akti:

1. Ustav Bosne i Hercegovine
Utvrđuje obavezu da sudovi primjenjuju Ustavom propisana ljudska prava i osnovne slobode u vezi sa Evropskom konvencijom za zaštitu ljudskih prava i osnovnih sloboda i njenim protokolima koji se direktno primjenjuju u Bosni i Hercegovini, a čiji član 6. propisuje pravo na pravično suđenje sa posebnim akcentom na suđenje u razumnom roku;
2. Zakon o sudovima u Federaciji Bosne i Hercegovine
Kantonalni sud u Bihaću nadležan je da u prvom stepenu odlučuje o krivičnim i upravnim predmetima, a u drugom stepenu o žalbama protiv odluka općinskih sudova;
3. Zakon o Visokom sudskom i tužilačkom vijeću Bosne i Hercegovine
Visoko sudsko i tužilačko vijeće, između ostalog, imenuje sudije, predsjednika suda, dodatne sudije, sudije porotnike, utvrđuje disciplinsku odgovornost i izriče disciplinske mjere sudijama;
4. Strateški plan VSTV-a
Dokument koji, pored ostalih, kao strateške ciljeve definiše unapređenje i efikasnost sudova, kvalitet rada pravosuđa, te otvorenost i dostupnost informacija o radu pravosudnih institucija u Bosni i Hercegovini;
5. Strategija za reformu sektora pravde u Bosni i Hercegovini
Postavlja strateški okvir za cjelokupan sektor pravde i predviđa da svaka institucija revidira svoje postojeće strateške planove ili izradi nove koji će biti u skladu sa strateškim okvirom cjelokupnog sektora;
6. Revidirana državna strategija za rad na predmetima ratnih zločina
Ova strategija je donesena sa ciljem da se pronađe sistemski pristup problematici rješavanja velikog broja predmeta ratnih zločina;
7. Strategija za borbu protiv organizovanog kriminala u Bosni i Hercegovini
Ova strategija prepoznaje sudove kao važne činioce koji moraju razviti unutrašnje potencijale i kapacitete za efikasnu borbu i strateški pristup problematici organizovanog kriminala;
8. Strategija za borbu protiv korupcije
Ima viziju svijeta u kojem su vlada, poslovni sektor, civilno društvo i svakodnevni život ljudi oslobođeni korupcije, a insistiranje na primjeni zakona i sankcionisanje su osnov ove strategije;
9. Sporazum o stabilizaciji i pridruživanju Evropskoj uniji,
Između ostalog, definiše da će strane u međusobnoj saradnji imati za cilj jačanje nezavisnosti sudstva i unapređenje njegove efikasnosti kao i jednakost u postupanju;
10. Izvještaj stručnjaka o pitanjima vladavine prava u Bosni i Hercegovini (Priebeov izvještaj iz 2019. godine)
Ovim dokumentom se ukazuje na niz nedostataka u vladavini prava u Bosni i Hercegovini;

3) Pregled strateških i trogodišnjih ciljeva za period strateškog planiranja

Strateški pristup je fokus usmjerio na tri konkretna strateška cilja:

1. Unapređenje efikasnosti rada suda
2. Unapređenje kvaliteta sudskih odluka
3. Unapređenje transparentnosti rada suda

1. Strateški cilj 1. - Unapređenje efikasnosti rada suda

Ostvarivanje navedenog strateškog cilja odnosi se prvenstveno na povećanje realizacije prvostepenih K predmeta sa akcentom na predmete iz oblasti organizovanog kriminala i korupcije, kao i zadržavanje postignute ažurnosti suda na ostalim referatima rješavanjem priliva predmeta. U pravcu ostvarivanja ovog strateškog cilja, Kantonalni sud u Bihaću definiše slijedeće trogodišnje ciljeve:

Trogodišnji cilj 1.1. *Smanjen broj neriješenih predmeta iz oblasti organizovanog kriminala i korupcije*

Predmeti koji se odnose na organizirani kriminal i korupciju imaju prioritet u radu suda. Kantonalni sud u Bihaću će svojim aktivnostima i dodatnim naporom u 2025. godini nastojati da na kraju godine ostanu deset (10) neriješena predmeta iz ove oblasti.

Aktivnosti koje ovaj sud planira provesti u okviru navedenog trogodišnjeg cilja su:

- a) Izrada Akcionog plana rješavanja predmeta iz oblasti organizovanog kriminala i korupcije;
- b) Analiza predmeta i utvrđivanje razloga zbog kojih predmeti iz plana nisu riješeni;
- c) Utvrđivanje prijedloga mjera za efikasno vođenje glavnih pretresa i njihovo provođenje;
- d) Analiza efikasnosti utvrđenih mjera i po potrebi preduzimanje dodatnih aktivnosti.

Trogodišnji cilj 1.2. *Rješavanje priliva predmeta*

Kantonalni sud u Bihaću, godinama unazad, ima dobru produktivnost rada. Naime, svake godine ovaj sud je rješavao više predmeta nego što ih je zaprimio. Iz tog razloga se broj neriješenih predmeta iz godine u godinu smanjuje. Izuzetak je 2023. godina u kojoj je sud riješio nešto manje predmeta od priliva. U 2025. godini sud će nastojati zadržati ažurnost suda na način da procent riješenosti priliva predmeta bude 100%.

Ovaj cilj sud će postići provođenjem sljedećih aktivnosti:

- a) Izradom kvartalnih planova za drugostepene predmete i praćenjem realizacije planova;
- b) Izradom godišnjeg plana i revizije plana za prvostepene predmete i praćenje realizacije plana;
- c) Analizom podataka o riješenosti priliva predmeta, te utvrđivanjem i provođenjem mjera za otklanjanje eventualnih problema;
- d) Analizom razloga eventualnog nerješavanja priliva predmeta i predlaganjem konkretnih mjera za ubrzanje postupka;
- e) Praćenjem realizacije usvojenih mjera;

- f) Praćenjem broja i strukture predmeta raspoređenih sudijama, te eventualno izmjena rasporeda ili broja predmeta ako nove okolnosti to zahtijevaju.

Strateški cilj 2. - Unapređenje kvaliteta sudskih odluka

Kantonalni sud u Bihaću želi podići na višu razinu kvalitetu sudskih odluka smanjenjem broja ukinutih odluka. Ovim strateškim ciljem prvenstveno se želi unaprediti kvaliteta sudskih odluka na krivičnim predmetima. Kvalitet rada na upravnim predmetima, koji je bio jedan od trogodišnjih ciljeva definisanih Strateškim planom 2022 - 2024 godina, sada je na zadovoljavajućem nivou tako da je ovaj cilj postignut. Na ostalim građanskim predmetima kvalitet rada je kontinuirano na visokom nivou. Stoga je u ostvarenju ovog strateškog cilja sud odredio sljedeći trogodišnji cilj:

Trogodišnji cilj 2.1. Smanjen procent ukinutih odluka na krivičnom referatu

Sud će svojim aktivnostima i dodatnim naporima doprinijeti povećanju kvaliteta sudskih odluka i nastojati da broj ukinutih odluka u 2025. godini ne bude veći od 30% a na kraju 2027. godine 20%.

Ovaj cilj će se ostvariti kroz sljedeće aktivnosti:

- a) Analiza razloga koji su doveli do ukidanja sudskih odluka;
- b) Praćenje sudske prakse;
- c) Redovno održavanje sjednica kolegija odjeljenja suda.

Strateški cilj 3. Unapređenje transparentnosti rada suda

U okviru ovog strateškog cilja prioritet je jačanje povjerenja javnosti u rad suda što se može postići većom transparentnošću u smislu ažurnog objavljivanja informacija o radu i posignutim rezultatima suda, tako da je Sud za ostvarenje ovog strateškog cilja odredio sljedeći trogodišnji cilj:

Trogodišnji cilj 3.1. Informisanje javnosti o pitanjima značajnim za rad suda

Kantonalni sud u Bihaću je u 2021. godini na web stranici suda, a nakon što su anonimizirane, objavio kompletne sve prvostepene presude koje je sud donio u predmetima ratnih zločina u period od 1995. do 31.10.2024. godine, njih ukupno 90, a ova aktivnost će se kontinuirano provoditi po donošenju novih odluka. U narednom periodu objavljivat će se i druge anonimizirane odluke od javnog interesa u skladu sa Pravilnikom o objavljivanju sudskih odluka, akata i informacija o predmetima Kantonalnog suda u Bihaću koji je donesen 19.06.2024. godine.

Ovaj cilj će se ostvariti kroz sljedeće aktivnosti:

1. Objavljivanje anonimiziranih pravosnažnih presuda suda donesenih u predmetima od javnog interesa i informacija o nepravosnažnim predmetima;
2. Objavljivanje odluka i akata od značaja za rad suda, a prema Listi akata koji se objavljuju;
3. Objavljivanje statističkih i drugih izvještaja o radu suda prema utvrđenoj Listi akata koji se objavljuju.

4) Sažetak prioriteta za plansku godinu, kao i procjene mogućih problema i rizika u realizaciji

Prioriteti Kantonalnog suda u Bihaću za plansku 2025. godinu, a u okviru strateških ciljeva su:

Strateški cilj 1. - Unapređenje efikasnosti rada suda

Ostvarivanje navedenog strateškog cilja odnosi se prvenstveno na povećanje broja riješenih prvostepenih K predmeta sa akcentom na predmete iz oblasti organizovanog kriminala i korupcije, kao i zadržavanje postignute ažurnosti suda na ostalim referatima rješavanjem priliva predmeta. Navedeni prioriteti su postavljeni nakon izvršene analize realizacije trogodišnjih ciljeva suda u periodu 2022.- 2024. godina, koji rezultati su ukazali na potrebu da se na krivičnom referatu i dalje poduzmaju dodatne mjere i aktivnosti. I pored 24 završena predmeta organizovanog kriminala i korupcije u ovom periodu, u 2025. godini postupak će se voditi u 12 rješivih predmeta (2 predmeta su nerješiva) iz ovih oblasti (stanje na dan 31.10.2024. godine). Očekivani rezultat da na kraju 2025. godine ostane 10 neriješenih predmeta, a na kraju perioda 8 predmeta, je realan s obzirom da se radi o složenim i predmetima od kojih neki ulaze i u dvogodišnji plan rješavanja predmeta. Broj neriješenih predmeta će zavisi i od priliva novih predmeta što može otežati realizaciju ovog cilja. Pored toga, u toku 2024. godine sud je napustilo dvoje sudija zbog odlaska u penziju dok je izabran samo jedan, a izbor drugog sudije je obustavljen i nije poznato kad će postupak izbora biti okončan.

Sud je 2023. godinu završio sa 98,10% riješenosti priliva predmeta dok je u prvih deset mjeseci 2024. godine priliv riješen u procentu od 100,10%. Cilj je da se u narednom periodu postigne ažurnost suda rješavanjem priliva predmeta u procentu od najmanje 100,00%. Problem koji bi mogao otežati realizaciju ovog cilja je povećani priliv predmeta u odnosu na ranije godine, kao i najveći broj zaprimljenih predmeta u toku mjeseca decembra i veće ranije pomenuti odlazak dvoje sudija.

Strateški cilj 2. - Unapređenje kvaliteta sudskih odluka

Odnosi se na unapređenje kvalitete sudskih odluka, prvenstveno na krivičnim predmetima. Analizom statističkih podataka o kvalitetu rada suda u periodu 2022. - 2024. godina, evidentan je veći broj ukinutih odluka u krivičnim predmetima u odnosu na građanske i upravne predmete. Naime, od 173 preispitivane odluke u krivičnim predmetima njih 59 (+ 5 djelimično ukinutih) ili 35,55% je ukinuto, dok je od 513 odluka u upravnim predmetima njih 48 ili 9,36% ukinuto. Kad su u pitanju drugostepeni građanski predmeti od 175 preispitivanih odluka po reviziji, 15 odluka ili 8,57% je ukinuto. Ovako ostvareni rezultati su lošiji od očekivanih rezultata na krivičnom odjeljenju. Naime, očekivani rezultat ukinutih odluka na krivičnim predmetima na kraju 2024 godinu bio je 20%. I pored ovako lošeg kvaliteta odluka na krivičnim predmetima, Sud u i narednom trogodišnjem periodu planira da procent ukinutih odluka na krivičnim predmetima ne prelazi 20% na kraju perioda.

Strateški cilj 3. - Unapređenje transparentnosti rada suda

U okviru ovog strateškog cilja prioritet je jačanje povjerenja javnosti u rad Suda što se može postići većom transparentnošću u smislu ažurnog objavljivanja informacija o radu Suda koje su razumljive svim građanima, a koje su značajne sa aspekta prava na pristup Sudu i uopšte prava na pravično suđenje. Redovnim informiranjem javnosti o postignutim rezultatima rada Suda u pogledu donesenih odluka i smanjenja broja neriješenih predmeta, skraćanja prosječnog trajanja postupka i drugim aspektima, javnost će biti upoznata da Sud već duži vremenski period ostvaruje pozitivne rezultate koji doprinose vladavini prava, a koji su do sada ostali manje vidljivi.

Sud je u junu 2024. godine donio provedbene akte za primjenu Smjernica za objavljivanje sudskih odluka, akata i informacija o predmetima VSTV-a i imenovao članove uređivačkog tijela kako bi se ovaj proces odvijao u skladu sa navedenim smjernicama.

Pravilnikom o objavljivanju sudskih odluka, akata i informacija o predmetima Kantonalnog suda u Bihaću predviđeno je da se objavljuju anonimizirane sve pravosnažne odluke od javnog interesa.

5) Analiza unutrašnjeg i vanjskog okruženja u kojem radi sud

SWOT analiza predstavlja most između sadašnjeg stanja, koje je utvrđeno situacionom analizom i željenog budućeg stanja koje se definiše strateškim planom razvoja. Ovaj koncept nam daje sistematsku analizu prijetnji i prilika, kao i njihovo usaglašavanje sa jakim i slabim stranama suda. SWOT analiza obezbjeđuje informacije korisne za usklađivanje kapaciteta i sposobnosti sa okruženjem u kojem sud djeluje.

SNAGE	SLABOSTI
- Dobri uslovi rada - Dobra materijalno- tehnička opremljenost suda - Educirane, iskusne i kompetentne sudije građanskog odjeljenja - Educirani i iskusni uposlenici suda - Kvalitet, efikasnost i ažurnost predmeta na građanskom referatu - Korištenje internet platformi za educiranje uposlenika suda	- Nedovoljna efikasnost rada na prvostepenim krivičnim predmetima - Lošiji kvalitet sudskih odluka na krivičnim predmetima - Nedovoljna aktivnost suda u objavama i informisanju javnosti o aktivnostima suda - U dogledno vrijeme veći nedostatak iskusnih sudija
PRILIKE	PRIJETNJE
- Sudjelovanje u izmjenama zakonske regulative - Interes donatora za rad suda - Edukacije sudaca i uposlenika putem seminara/webinara - Prisutnost međunarodnih organizacija koje pružaju podršku migrantima	- Kompleksan politički sistem i njegovi akteri u Bosni i Hercegovini - Nedostatak sudskih tumača za maternje jezike migranata - Nemogućnost planiranja potrebnih ljudskih i materijalnih resursa zbog neizvjesnosti oko priliva većeg broja kompleksnih predmeta - Nedovoljan broj sudija

Kantonalni sud u Bihaću, za razliku od većine sudova u Bosni i Hercegovini, kao svoju snagu ističe dobre uslove rada u novoj zgradi i njenu materijalno tehničku opremljenost, koja je većim dijelom napravljena i opremljena iz donatorskih sredstava. Također, suci su se tokom svog dugogodišnjeg rada u pravosuđu specijalizirali za rješavanja predmeta iz određene oblasti.

Kao slabost u određenoj mjeri, Kantonalni sud u Bihaću prepoznao je u radu na prvostepenim krivičnim predmetima iz oblasti organizovanog kriminala i korupcije. U pravilu, ovo su predmeti sa većim brojem optuženih, svjedoka i dokaza koje treba izvesti a koji usložnjavaju rad na ovim predmetima. Međutim, bez obzira na složenost postupka, rješavanje ovih predmeta u razumnim rokovima je prioritet suda.

Kada su u pitanju prilike ističemo mogućnost učešća u izmjenama zakonske regulative, edukacijama sudija i zaposlenika. Također, kao svoju priliku vidimo u, još uvijek, izraženom interesu donatora za rad suda kako bi, koristeći njihova sredstava, još više unaprijedili uslove rada.

Najveća prijetnja i izazov su politička neizvjesnost kao i financijska kriza. Rad na postupcima koji se vode protiv migranata je znatno otežan iz razloga što nema sudskih tumača, pa ni drugih lica koja poznaju maternji jezik migranata. Također, jedna od prijetnji efikasnom radu suda je i neblagovremeno imenovanje novih sudija koji bi zamijenili sudije kojima prestaje mandat zbog odlaska u penziju.

B. Pregled ciljeva i godišnjih aktivnosti po strateškim i trogodišnjim ciljevima

Strateški cilj 1		Unapređenje efikasnosti rada suda		
Trogodišnji cilj 1.1.		Smanjen broj neriješenih predmeta iz oblasti organizovanog kriminala i korupcije		
Pokazatelji za izlazne rezultate		Očekivani rezultati po godinama		
		2025 (n)	2026 (n+1)	2027 (n+2)
Broj neriješenih predmeta iz oblasti organizovanog kriminala i korupcije		10	9	8
Redni broj	Naziv aktivnosti za 2025. godinu	Rok izvršenja		Nosilac
1.	Izrada Akcionog plana za rješavanje predmeta iz oblasti organizovanog kriminala i korupcije	I kvartal		Odjeljenje sudske uprave
2.	Analiza predmeta i utvrđivanje razloga zbog kojih predmeti iz plana nisu riješeni	I-IV kvartal		Predsjednik vijeća Predsjednik krivičnog odjeljenja
3.	Utvrđivanje prijedloga mjera za efikasno vođenje glavnih pretresa i njihovo provođenje	I-IV kvartal		Predsjednik vijeća Predsjednik krivičnog odjeljenja
4.	Analiza efikasnosti utvrđenih mjera i po potrebi preduzimanje dodatnih aktivnosti	I-IV kvartal		Predsjednik vijeća Predsjednik krivičnog odjeljenja Predsjednica suda

Strateški cilj 1		Unapređenje efikasnosti rada suda		
Trogodišnji cilj 1.2.		Rješavanje priliva predmeta		
Pokazatelji za izlazne rezultate		Očekivani rezultati po godinama		
		2025 (n)	2026 (n+1)	2027 (n+2)
Procent riješenosti priliva predmeta		100%	102%	103%
Redni broj	Naziv aktivnosti za 2025. godinu	Rok izvršenja		Nosilac
1.	Izrada kvartalnih planova za drugostepene predmete i praćenje realizacije	I-IV kvartal		Odjeljenje sudske uprave Sudije
2.	Izrada godišnjeg plana i revizije plana za prvostepene predmete i praćenje realizacije	I-IV kvartal		Odjeljenje sudske uprave Sudije
3.	Analiza podataka o riješenosti priliva predmeta, te utvrđivanje i provođenje mjera za otklanjanje eventualnih problema	I-IV kvartal		Sudije Predsjednici odjeljenja Predsjednica suda
4.	Praćenje realizacije usvojenih mjera	I-IV kvartal		Predsjednici odjeljenja Predsjednica suda
5.	Praćenje broja i strukture predmeta raspoređenih sudijama te eventualno izmjena rasporeda ili broja predmeta ako nove okolnosti to zahtijevaju	I-IV kvartal		Predsjednici odjeljenja Predsjednica suda

Strateški cilj 2.		Unapređenje kvaliteta rada suda		
Trogodišnji cilj 2.1.		<i>Smanjen procent ukinutih odluka na krivičnom referatu</i>		
Pokazatelji za izlazne rezultate		Očekivani rezultati po godinama		
		2025 (n)	2026 (n+1)	2027 (n+2)
Procent ukinutih odluka na krivičnom referatu		30%	25%	20%
Redni broj	Naziv aktivnosti za 2025. godinu	Rok izvršenja		Nosilac
1.	Analiza razloga koji su doveli do ukidanja sudskih odluka	I-IV kvartal		Postupajući sudija Predsjednik odjeljenja
2.	Praćenje sudske prakse	I-IV kvartal		Predsjednik odjeljenja
3.	Redovno održavanje sjednica kolegija odjeljenja suda	I-IV kvartal		Predsjednik odjeljenja

Strateški cilj 3.		Unapređenje transparentnosti rada suda		
Trogodišnji cilj 3.1.		<i>Informisanje javnosti o pitanjima značajnim za rad suda</i>		
Pokazatelji za izlazne rezultate		Očekivani rezultati po godinama		
		2025 (n)	2026 (n+1)	2027 (n+2)
Broj objava na web stranici suda		+5%	+6%	+7%
Redni broj	Naziv aktivnosti za 2025. godinu	Rok izvršenja		Nosilac
1.	Objavljivanje anonimiziranih pravosnažnih presuda suda donesenih u predmetima od javnog interesa i informacija o nepravosnažnim predmetima	I-IV kvartal		Postupajući sudija Uređivačko tijelo
2.	Objavljivanje odluka i akata od značaja za rad suda a prema listi akata koji se objavljuju	I-IV kvartal		Sudska uprava Uređivačko tijelo
3.	Objavljivanje statističkih i drugih izvještaja o radu suda prema utvrđenoj listi akata koji se objavljuju	I-IV kvartal		Sudska uprava Uređivačko tijelo

C. Godišnji plan rješavanja predmeta

Plan rješavanja predmeta se izrađuje u skladu sa važećim Uputstvom za izradu planova rješavanja predmeta usvojenog od strane VSTV-a.

Pored godišnjeg plana rješavanja prvostepenih predmeta, kantonalni sudovi su u obavezi da sačinjavaju i kvartalne planove za drugostepene predmete.

Godišnji plan rješavanja sudskih predmeta za 2024. godinu

Redni broj	Naziv sudskog odjeljenja	Broj sudija u sudskom odjeljenju	Broj planiranih sudskih predmeta	Norma po sudiji
1.	Građansko odjeljenje (U i V)	6	370	242
2.	Krivično odjeljenje	5	24	44

D. Ostale informacije

Prema odluci VSTV-a u sudu su sistematizovana mjesta za 18 (osamnaest) redovnih sudija i 10 (deset) dodatnih sudija, međutim godinama je ovaj sud ima znatno manji broj imenovanih sudaca. Na početku 2024. godine sud je imao 14 sudaca, dva suca su otišla u penziju dok je u toku godine imenovana samo jedna sutkinja pa je tako na dan 31.10.2024. godine ovaj sud je imao 13 sudaca.

Za obavljanje poslova osnovne djelatnosti, dopunske poslove osnovne djelatnosti i poslove pomoćnih djelatnosti u Sudu, Pravilnikom o unutrašnjoj organizaciji sistematizovano je ukupno 45 izvršilaca i to: 9 državnih službenika i 36 namještenika. Struktura državnih službenika i namještenika u sudu na dan 31.10.2024. godine, izgledala je ovako: državnih službenika 6; namještenika 26 ili ukupno 32 državna službenika i namještenika.

Budžetom Unsko-sanskog kantona za 2024. godinu sudu su odobrena sredstva u ukupnom iznosu od 3.844.533,00 KM na pretpostavljeni broj od 51 zaposlenika. U pogledu materijalnog poslovanja sud se uklapao u okvire stavki dodijeljenih mu budžetskih sredstava.

Broj: 001-0-Su-24-000 868
Bihać, 19.11.2024. godine



Predsjednica suda:
Fata Nadarević